



Jens Napãtôk, Naleraq

Upernavik, 12. januar 2024

Inatsisartut Suleriaasianni § 37 imm. 1 naapertorlugu Naalakkersuisunut apeqqut imaattoq matumuuna saqqummiuppara.

**Naalakkersuisunut apeqqut:**

1. Aalisartut piniartullu 2023-ip naalernerani inuuniarnikkut ajornartorsiuteqartut ukiorserneqarnissaannik Naalakkersuisut neriorsuineranut maannamut piviusunngortinneqanngitsumut suna imaluunniit suut pissutaappat ?
2. Ilumut aalisartut piniartullu qulaani eqqartorneqartut ikiorserneqarniarpaat ?
3. Ikiorsiisoqassappat tamanna qaqugu piviusunngortinneqassua ?
4. Ikiorsiinissamut suut piunasaqaataassappat ?
5. Ikiorsiisoqassappat aalisartut piniartullu illoqarfinni nunaqarfinnilu sorlarni najungaartut eqqartorneqarpat ?
6. Ikiorsiisoqassappat ikiorsiissutit qanoq annertutiginnissaat aamma qanoq siviutiginisumik ikiorsiineq atuutsinneqassua ?
7. qanoq suleriuseqartoqarniarpa ?
8. Ikorsisoqassappat ikiorsiissutit qanoq agguanneqassappat ?
9. Ikiorsiisoqassappat ilaqutariit meerartallit immikkut tapiiffigineqassappaat ?
10. Ikiorsiisoqassappat ikiorsiissutit ineqarnermut kiassarnermut kallerullu inneranut aningaasartuutit immikkut ilanngunneqassappaat ?
11. Ikiorsiisoqassappat aalisartut piniartullu qimmiisa nerukkaatissaqartinneqarnissaat ilanngullugit ikiorsiissutigineqassappaat ?
12. Siunissaq ungasinnerusoq eqqarsaatigalugu taama ikiorsiisoqarnissaanik pisariaqartitsisoqalissangaluarpoq Naalakkersuisut taamanikkussamut periusissiamik suliaqarnissamut pilersaaruteqarpat ?



**Jens Napãtôk, Naleraq**

**Upernavik, 12. januar 2024**

**13. Ilumut Naalackersuisut immikkut ittumik ikiorsiisarnissamut periusissiamik suliaqassangunik, periusissiassaq qaqugu piareersimassanersoq Naalackersuisut naatsorsuutingaat ?**

**14. Aalisartut piniartullu nappaammik eqqorneqartut nunatsinni sumiikkaluarunilluunniit ikiorserneqarnissaminut qanoq periarfissaqarpat ?**

**(Inatsisartut Ilaasortaq, Jens NapãtôK', Naleraq)**

**-Tungavilersuut:**

Naluneqanngitsutut ukioq 2023 naalersoq aalisartut piniartullu Avanersuarmit silap pissusaata allanngorujussuarnera, minnerunngitsumillu kaperlannera pissutigalugu aalisariarnissamut piniariarnissamullu periarfissaat ajornarsivissimmata Naalackersuisuniit tusagassiutitigut nalunaarutigineqarpoq, taakku pineqartut ukiup naannginnerani inuuniarnikkut immikkut ittumik ikiorserneqassasut.

Ajoraluartumik ulloq manna tikillugu Naalackersuisut neriorsuutertik piviusunngortinngitsoorpaat, tamannalu aalisartunut piniartunullu taakkulu ilaqutaannut assorujussuaq ajornartoortunut suusupaginninnerullunilu pakatsissutaavoq eqquinerlullunilu.

Tassami naluneqanngitsutut ilaqutariit kikkulluunniit jullimut sapaassuit aallartinnerini atuunnerinilu ilaqutariit pisariaqartitsinerat annertusisarmat, minnerunngitsumillu jullip titaatsunnartua meeqqat qilanaarnerannut nuannersumik sunniuteqassappat angajoqqaat aningaasaqarnikkut naammaginatsumik inissisimanissaat pisariqartinneqartarmat.

Aalisartut piniartullu qulaani pineqartut soorunami aalisariarsinnaanngikkallarnerminni piniariarsinnaanngikkallarnerminnilu aningaasanik isertitassaqannginnamik, ineqarnermut, kiassarnermut kallerullu inneranut akiliisinnaajunnaarsimassasut naatsorsuutigineqarsinnaavoq.



**Jens Napãtôk, Naleraq**  
**Upernavik, 12. januar 2024**

Aamma taamaappoq aalisartut piniartullu qimmillit qimmiminnut nerukkaatissanik pisinissamut akissaqanngimmata.

Malunginiarneqassooq suliap arriippallaartumik suliarineqarnera Naleqqamiit akuerinngilluinnaratsingu.

Akissutit kingusinnerpaamik ullut suliffiit qulit qaangiutinnginnerini tigusimanissaat kissaatiginarput.